

Date – 01/09/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Tunlai ruahsur nasa avanga chhiatna thleng chuan Aizawl District khawsak phung a tikhaihlak mek.**
- 2. Mizoram PWD hotute leh Central YMA hruaitute'n an thawhhona thuthlung leh Mizoram chhunga inkalpawhna kawng dinhmun bakah Aizawl khawpui chhung kawngpui chhe lutuk chungchange an sawiho.**
- 3. Mizoram chhunga thlai thar te hralh nan Aizawl kawtchhuah hmun 4-ah Agriculture Produce Wholesale Market sak a ni dawn.**

<><><>

DISASTER

Tunlai ruahsur nasa avanga chhiatna thleng chuan Aizawl District khawsak phung a tikhaihlak mek a, veng chhung leh kawngpui dunga leimin hrang hrang thenfai hnatlang nimin khan thawh a ni.

Hunthar Govt. M/S bul chu nasa taka a chet belh avangin he kawng hi lirthei zawh atan a him tawh lova, chhiatna nasa zawk thleng thei laka mipui leh lirthei khalhtute an him tlan nan Hunthar Govt. M/S bul kawng chu khar rih a ni.

District Disaster Management Authority (DDMA) Aizawl Chairman Pu C. Lalhriatpuia, Deputy Commissioner chuan Vaivakawn Zohnuaia chenna in pakhat, Pu Sangthanmawia building chu a rang thei ang bera thiat turin nimin khan thupek a chhuah a. Hei hi a bul hnaia cheng te, kea kal mipui leh lirtheia veivakte him nana ruahman a ni.

Kum 2022 atang khan Vaivakawn Zohnuai lei tlahniam hi lo lang tanin, ADDMA, SP (Aizawl), SP (Traffic), Aizawl, PWD, PHED, P&E, SIPMIU, G&M leh a kaihnawih NGO te'n tum engemawzah an lo endikho tawh thin a. Lei tlahniamin harsatna a thlente tiziaawm tur leh Vaivakawn Zohnuai Road leh NH-06 te changtlung zawka cheibawl chungchang ngaihtuah a ni thin bawk a. Zirchianna atanga a landan chuan building hi a inherh mai bakah a awn a; hei vang hian a bang, chhuat leh retaining wall hmun tam takah a khi a, chenna atan a him loh phah ta a ni.

Heng bakah hian PWD, Quality Control, Research & Development Division chuan building a him leh him loh an zir chiang bawk a. Sr. EE, PWD, Quality Control, Research & Development Division-in zirchianna a report dan chuan concrete chak zawng hi M10 to M19 inkar a ni a, bang atana leirawhchan hman, beam leh column-ahte khi tam tak a awm a, heng bakah hian kawng chung lama ground floor level chu road level atanga tehin feet 2-in a tla hniam a ni.

Building hi Vaivakawn Zohnuai kawng lamah 88.88 degree velin a awn a. Hemi a nih avang hian DDMA Aizawl chuan Pu Sangthanmawia, building, Vaivakawn, Aizawl chu ruah tla zel avanga lei tlahniamin a dinhmun tichhiaa mihring nunna leh a vela in leh loah harsatna nasa zawk a thlen theih avangin thiah tul a ti ta a ni.

<><><>

PWD & CYMA

Mizoram PWD hotute leh Central YMA hruaitute Zirtawpni khan inkawmin thawhona thuthlung an ziah tawh chungchang an sawiho.

PWD Engineer in Chief Conference Hall-a inkawmhonaah hian hian Mizoram chhunga inkalpawhna kawng dinhmun bakah Aizawl khawpui chhung kawngpui chhe lutuk te sawi a ni a.

Mizoram hmun hrang hranga PWD enkawl kawngpui laih mek chungchang te pawh sawiho a ni a; chu'ng zingah chuan Champhai leh Zokhawthar inkar kawng laih mek te, Mamit leh Bairabi inkar, Saikhawthlir atanga Zamuang inkar te bakah Aizawl khawpui chhung kawng chhe lutuk chungchangte sawi lan a ni a. Central YMA hruaitute chuan kawng laitu hnathawk chak lo ten chak zawka hna an thawh theihna tura puih an ngaihnaah PWD chu puih an inhuam thu an sawi a. Nakuma YMA Inkhawmpui Lian thlenna tur Sakawrdai panna kawng siam that chungchang te leh Mizoram hmun hrang hranga PMGSY kawng laih mek chungchang te sawiho a ni bawk.

PWD hotute chuan Aizawl khawpui chhung kawng chhia leh khuar nasa lutuk chu ruah tui a tlak reng avanga thawh theih a nih loh thu leh khaw that veleha thawk thei tura an inpeih thu an sawi a. CYMA hruaitute chuan kawng sira tuilankawr khuh phui a nih avanga kawngpuia tuihawk luang nasain kawng a tih chhiat theih thu an sawi a. A khuhna hi hawna tuihawk luan luh theiha siam an duh thu an sawi bawk.

Central YMA leh PWD hian kum 2018 June thla khan Mizoramin kawngpui tha a neih theihna tura thawhona thuthlung (MoU) an ziak a, tuna MOU hi nakum July-ah a tawp ang.

Inkawmhona hi PWD Engineer-in-Chief, Pu Lalrinkima Hnamte in a kaihruai a, PWD Chief Engineer ho te leh Central YMA President Pu Lalhmachhuana leh OB dangte an tel a ni.

<><><>

AGRI WHOLESale MARKET

Agriculture Minister Pu PC Vanlalruata leh Environment, Forest & Climate Change Minister Pu Lalthansanga te'n Sihphir Venghlun, Phunchawng, Falkawn leh Mel 3-a 'Agriculture Produce Wholesale Market' sak theihna hmun tur nimin khan an enho.

Pu Lalthansanga chuan Aizawl dai vel mai ni lo, Zokhaw lama kuthnathawka eizawng tam tak te'n thlai thar hralh chungchangah harsatna an tawk nasa thin hle, a ti a. Mizoram chhunga thlai tharte pawh wholesale market neih a nih chuan a hralhna kawngah hmasawna a awm phah ngei a beisei tih a sawi.

Agriculture Minister Pu PC Vanlalruata pawhin Wholesale Market chu sak theih a nih chuan thlai thar vawn thatna tur Cold Storage leh kuthnathawktute hah chawlhna te bakah Market Building chhungah ATM booth te dah tum a nih thu a sawi a, he'ng hian kuthnathawktute tan malsawmna thar a thlen theih ngei a beisei tih a sawi ve bawk.

Agriculture Produce Wholesale Market hi RKVY Scheme atanga sak tur niin Mizoram chhunga thlai thar te hralh nan Aizawl kawtchhuah hmun 4-ah sak a ni dawn a, Aizawl North leh South te chu hmalakna hmasaah hman an ni dawn a ni.

<><><>

HIV/AIDS

Aizawl District AIDS Prevention and Control Committee (DAPCU) in a tarlan danin Aizawl dist-ah HIV/AIDS vei hmuhchhuah thar a tlahniam hret hret a, kum 2018 atanga 2024 chung khan chhinchhiahna hrang hrang atangin HIV vei hmuhchhuah thar hi a tlahniam hret a. Kum 2018-19 khan HIV vei hmuhchhuah mi 2141 an nih lain kum 2023-24 ah chuan mi 1373 chhinchhiah an ni.

Aizawl District AIDS Prevention and Control Committee hi nimin khan Aizawl DC Conference Hall-ah 'IEC Campaign on India Fight against HIV/AIDS and STIs' kalpui dan tur relin an thukhawm a, HIV hrik darh zel tur venna kawnga hmalakna beihpui thlak dan tur an sawiho a ni.

'IEC Campaign on India fight against HIV/AIDS and STIs' hi tun thla chung kalpui tur a ni a. HIV/AIDS la vei lote him zel nana zirtirna tha pek leh a vei tawh ten hriselna tha an neih theih nan leh midang an kaichhawn loh nan inenkawlina tha pek chu a tum ber a ni tih thutkhawmah hian tarlan a ni.

<><><>

SABB

Sorkar laipuaia Ministry of Housing and Urban Affairs-in Swachh Bharat Mission-Urban 2.0 kaltlanga a kalpui ‘Safai Apnao, Bimaari Bhagao’ (SABB) chu Mizoram hmun hrang hrangah thla 2 chhung kalpui a ni.

Nimin zing khan Aizawl Zotlang veng chuan khawtlang tifaian hnatlang an thawk a, hnatlangah hian vengchhung mi thahnem tak an thawk chhuak a ni.

SABB hi ‘Stop Diarrhoea Campaign’ nena kaihkawp niin fur laia faina leh natna hrang hrang dona kawnga hmalakna te, mipuite hriselna leh faina kawng zirtirte leh department hrang hrang thawhhoa helam kawnga hmalakte chu an campaign hnuaiah hian a tel a, ramchhung hmun hrang hrangah hemi pual hian hun hman a ni tawh a ni.

<><><>

CHAMPHAI SOUTH MLA

Special Assistance to States for Capital Investment (SASCI) sum Cheng vaibelchhe 13 leh Nuai 11 sengin Melbuk leh Zokhawthar inkar Vawmkawlui Box Culvert lei chim leh lei che avanga kawngpui kaltlang theih loha awm chu siamthat mek a ni.

Champhai South Bialtu MLA Lt. Col. Clement Lalhmingthanga chuan helai hmun hi nimin zing khan tlawhin thawktute chu a tha thei ang bera hna thawk tur leh lirthei ten an zawh thuai theih nan theihtawp chhuah turin a chah a. Hnathawh kal mek hi zaa sawmriat thawh zawh tawh niin hnathawktute chuan an sawi.

Champhai South bialtu MLA hian Zokhawthar leh Myanmar in-rina, Tiau lui kam vel pawh tlawhin Customs duty te a kawm a. Bungrua zawng zawng lak luh khap a nih hnua mipuiin harsatna an tawh te hriain sawrkarin a khap bak ni tin mimal eizawna leh chakkhai zualpui lak luh te, a hmuna bungraw phura la luttu inhlawhfate chu hriatthiamna nena lo en turin Customs duty te chu a ngen a. Mizoram sawrkarin Indo-Myanmar Border Trade a ngaih pawimawh thu leh tihchangtlun nana hma a lak zel thu te sawiin, Zokhawthara Border Trade kaltlanga insumdawn tawna hmun khar mek a nih chungchangah helai hmun behchhana ni tina eizawngten harsatna an tawh loh nan ngaihtuahna sen a tul a ni, a ti bawk.

Puan tawh angin Myanmar atanga Mizoramin chakkhai leh ni tin mamawh a lakluhna kawngpui pawimawh ber, Teddim kaltlanga Tahan atanga Zokhawthar panna Run Lei chu kumin June ni 8 khan bomb chhiat a ni a, wawiin thlengin siamthat a la ni lova; sumdawna bungrua leh ni tin mamawhte chu kawng hla zawk, Falam paltlangtu kawngpui lamah kalpui a ngaih avangin Zokhawthar leh Khawmawiah bungraw lut a tlemin a lut chhunte pawh a man a to ta a ni. Bungraw hlankai leh lakthlak hnathawktu, chhungkaw 700 vel ten thawh tur an neih mumal loh avangin mi tam takin harsatna an tawk a, thingpui dawr leh dawr tenau neitute bakah mipui mimir nunphung pawh sumdawna bungraw kal tlem hian nasa takin a nghawng mek a ni.

<><><>